

湖南褒忠錄初稿

湖南褒忠錄初彙

殉防一

州同銜武陵訓導儲玫躬

生員楊英華

附

儲玫躬字石友靖州廩生素慷慨負大志每州有公事商之士紳者玫躬輒以身任翕然推州望道光末逆匪李沅發踞新甯靖人驚恐玫躬與門人生員丁際可等募壯士助捕平之錄功以訓導歸部卽選咸豐三年選武陵儒學訓導粵逆洪秀全等犯楚所在戒嚴玫躬與際可團結州子弟嚴堵之靖州帖然三年奉巡撫駱秉章飭與王鑫等勦土匪於桂東等處皆捷永興告警玫躬率師由鄱縣進勦賊潰走是冬常甯土匪圍藍山玫

躬馳援甯抵境賊盡銳出撲我師攻躬迎擊敗賊古城殲之彭
村藍山平道州賊負隅四厂橋抗官軍相持十餘日攻躬由藍
山會剿十二月初八日親督壯士喻西林等進擊斃賊百餘人
賊大潰四年二月湖北黃州賊由岳州竄湘陰分擾甯鄉團防
大臣曾國藩駐長沙檄攻躬率所部五百人堵擊靖港攻躬馳
至中途聞甯鄉陷謂其下曰此要衝也不急擊賊必蔓延遂改
道甯鄉時攻躬年六十餘天大雪深尺許五百人苦凍甚攻躬
激以忠義身先導行士皆感憤用命賊數千人分踞縣城各門
外方肆酣飲聞人馬聲則大驚攻躬奮擊於龍塘灣賊莫辨官
軍多寡駭而走自相踐踏攻躬由南門轉戰至西北二門賊大

敗盡奪其騾馬旂幟器械及東門突有賊百數從城隅出橫擊時五百人分途逐賊眾寡不敵遂與諸生楊英華壯士喻西林等十七人皆遇害是夕賊遁甯人陷賊中者皆得免咸哀思之爲立祠於邑以祀十七人附奏上奉

詔照同知直隸州議卹給卹職楊英華亦靖州人於玫躬爲甥少從玫躬遊豪宕類之與玫躬偕死得卹如例餘十六人見後

故貴州荔波縣知縣同知銜魏承柷

魏承柷字將侯衡陽人父瀚舉人安邑知縣有政聲承柷道光丁酉拔貢生連舉於鄉久之得官貴州署普定知縣縣多盜承

祝以計擒樓枕山渠魁盜以衰天柱縣民石大田等因征糧鼓眾毀官署縣令踉蹌遁安順知府胡林翼廉承祝能言於上官檄帶兵往且代縣承祝曰民困苛征久矣懼之以兵必爲大變遂獨偕親友數人馳抵任曉令歸罪有寬許呈訴果有眾數千呈懇寬狀承祝乃徧召父老諭以道義禍福凡浮征者悉減之士民歡伏事遂平新甯匪李沅發反擾及黔境承祝獲梟偵者三人賊遂走廣西事 聞加同知銜天柱有洞徑狹而中廣百餘里盜據爲巢承祝潛兵入獲盜二百人以歸縣素無城率民鳩貲伐石建之改權開泰清積逋久獄力行保甲築立碉堡邑以無事廣西思恩賊朱老九逼荔波改授荔波知縣至則於境

上築雄關十餘所率兵民守之思恩求援星夜率軍進剿三戰皆捷思恩復由是以知兵聞會同年生江忠源以辦賊奉巡撫安徽之命奏調之承柷還湖南將往而忠源殉難廬州湖南巡撫駱秉章截留衡州辦理團防五年粵逆陷東安衡陽土匪響應時承柷次祁陽聞警率勇移駐衡西捕斬二十餘人廣東賊何祿竄陷郴州承柷與兵備道李維醇團聚郴民數千與道員王鑫副將李輔朝分路進剿甫交綏我師潰賊乘勢尾追承柷手戈刺殺騎馬紅衣賊二人俄中火毬仆地遂遇害親兵王福羅繩祖殉之後十餘日郴城復獲一賊害承柷者剖心以祭事上

詔依同知例議卹 予世職同治九年御史張沄 奏請本籍
捐貲建立專祠奉

旨俞允

謚壯節道員江忠濟

縣丞鄒永喆

增

江忠濟字汝舟新甯人安徽巡撫忠源之弟道光二十九年李
沅發反新甯忠濟募勇助剿月餘不下忠濟穴城轟之賊宵遁
咸豐二年粵賊犯楚陷道州桂陽據郴州分股竄長沙時忠源
任剿賊忠濟則率壯勇五百隸提督和春擊賊郴城賊棄城走
追敗之斬首七十級旋從忠源守禦長沙明年忠源奉命署

湖北按察使司以舊部千人屬忠濟及李輔朝同邑拔貢生劉民佑率之平衡州土匪會湖北匪蜂起忠源討之斬賊魁劉立簡於通城而崇陽賊陳北斗竄通城界忠源兵單總督張亮基檄忠濟往援忠濟率五百人抵崇之桂口遇賊卽夕掩擊斬陳北斗馳赴通城適忠源將戰喜拊其背曰非弟莫破此賊者忠濟躍而起率壯士赴敵忠源鼓之賊大敗死者不勝數是役賊眾幾萬人我軍不滿二千當事上其功授通判江甯賊犯江西忠源襄辦江南營務引軍往援忠濟分守章江門賊據城外文孝廟穴城城少崩忠濟急率壯勇囊土築之俄而城大圯築者多陷忠濟躍而免督築益急城卒完賊復爲左右隧道實火藥

同發城崩八十餘丈賊大譟薄城忠濟率壯勇冒煙城扼截之
斬登城悍賊數十人賊立卻城再得完忠源乃命健卒爲隧道
出鑿濠引水注之賊計窮圍三月遂遁敍功擢知府賞孔雀
翎三年冬湖南南路急忠濟時在籍率師援永州解藍山圍時
所部僅千三百人分途攻勦賊震其名望風潰嘗以二百人破
賊千餘於荷葉鄉甯遠嘉禾以次皆平旋又敗賊於連州朱岡
堡

詔以道員補用五年永州平率三千人駐岳州爲湖南防通城
賊復起奉檄抵通四月四日賊悉精銳數萬至圍我師忠濟前
戰賊自後抄擊忠濟手刃我軍反顧者數人賊益眾遂遇害年

三十有六事上

詔加恩賜卹如例 給世職 予諡壯節崇祀昭忠祠

鄒永喆號竹窗新化人好學不事章句族漢勳漢章均以博雅聞尤以節義相砥礪咸豐二年四月粵匪屠全州逼新甯舉郡倉皇郡守魁聯募勇屬永喆等擇要扼之郡以無事敘八品頂戴賊陷湖北江忠源率師往勦永喆從之復隨之南昌協同防守迄數月不懈敘功以從九儘先補用粵匪擾藍山嘉禾等縣偕江忠濟回援事平從防岳州備北路進縣丞按察使經歷賞戴藍翎以省親歸尋丁父憂及湖北復陷忠濟以書促永喆復至岳州移營通城咸豐五年四月四日通城賊以大股逼官

清江縣志卷之三
軍營忠濟麾眾迎擊死之永喆與偕死親兵鄒法修鄒世泰羅
先慶鄒祿吉殉焉是役藍翎千總徐士松藍翎六品陳大通附
生陳邦偉從九尹昌溶蔣錫祚藍翎把總孫榮駿把總王用予
藍翎外委陳春福從九吳憲武文童陳春帆皆力戰而死憲武
善化人春帆長沙人餘未詳

增廣生蔡漱德

蔡漱德字雲谷江蘇吳縣人占籍湘潭入學爲諸生咸豐初善
化鄒壽璋奉團防大臣委防堵瀏陽桂陽藍山等處漱德從之
四年二月調防岳州賊由崇通大至壽璋與各營三路出剿連
有斬獲已而各營皆潰賊乘勝繞出陣後漱德困圍中不能出

被害於金雞山下初漱德自衡之岳便道歸家子忠篤適生漱
德越日卽行遂不返云

附漱德遺詩登岳陽樓云二十年前此舊遊重來惟見古時
樓地經兵燹留遺跡身處江湖抱隱憂萬里風濤飛野鷺平
生踪跡託閒鷗何當掃盡欃槍影也學神仙作醉侯從戎云
中原羣盜亂如麻極目烽烟枉自嗟磨劍十年猶在手據鞍
四顧便忘家故應投筆親戎馬豈必登壇建節牙悲憤一腔
何處洩中宵起舞影橫斜銀河明滅夜將闌策馬慙慙敢自
安曉徑霧迷三里暗單衣風透五更寒筍輿行處身如簸柴
竈薰來淚不乾卽此備嘗行役苦何須蜀道始知難山徑崎

嶇不易行馬瘡僕瘁尙過征雲生斷岸疑無路風到叢林倍
有聲嶺樹插天迷遠近烽烟匝地望縱橫書生亦有渾身膽
一劍輕遊萬里程

附生伍宏鑑

伍宏鑑字海門沅江人父朝贊字愛山爲邵諸生有名於時宏
鑑弱冠補弟子員豪宕負奇氣力能開兩石弓好擊刺諸技又
好客有患難以身維持之以義俠聞湘沅間尤留心兵法常仰
觀天文諱曰兵戈將起矣聞者以爲狂嘆夷犯粵果勇侯楊芳
聞其名以重幣聘之宏鑑曰父母在不可以身許人固辭不往
沅江瀕水歲屢大歉死者相望於道朝贊好施與所耗散千金

家頓落宏鑑遂客吳旋客粵於馬上周覽形勢輒曰是可屯營
是可設卡後粵賊犯楚果以某所無備遂至長驅入爲天下患
當兵事亟時獨往見團防大臣曾國藩出謂人曰宏鑑今可無
憾熱血可灑矣賊竄湖南將由甯鄉撲湘潭宏鑑率湘勇五百
人與魏崇德郭鴻勳堵於甯鄉東門外賊突以萬人圍擊之時
三人所部僅千八百人鏖戰竟日士死者過半所殺賊亦百餘
人已而賊益至魏郭兩營皆潰回顧所部僅十餘人皆被創已
復馳馬突圍不能出遂遇害時咸豐四年三月二十五日也子
庠牛華瀚服闋後復効力國藩部下統領馬軍屢戰有功洊擢
至記名道 賞戴花翎鋒勇巴圖魯勇號當宏鑑殉難時軍務

繁興卹典不與華瀚以爲憾及同治元年華瀚以勞卒於軍國
藩並以宏鑑卹請得

旨賜卹如例從祀湖南昭忠祠宏鑑著有古文二卷駢體文二
卷古近體詩六卷待梓子二長卽華瀚次華澧華瀚自有傳

庠生謝秉衡

謝秉衡字鑑潭新田人邑諸生長軀偉髯家貧以課徒自給道
光丙午年粵西有變本縣土匪聚眾抄掠鄉里騷然秉衡聯絡
十餘村擒其魁斬之及金田寇起土匪乘機響應秉衡復糾集
里子弟署以兵法約鄰團爲聲援互相防禦匪亦稍戢當事嘉
之奏賞六品頂戴咸豐四年冬嘉禾土匪尹尙英糾黨竄新

田秉衡衣敝衫雪夜走城中與同局諸人謀募勇助剿遂同敗賊牛馬嶺曹家坊等處境內稍安明年粵東賊何祿竄陷郴州宜章分黨犯嘉禾知縣袁慧業遣使乞援遂奉檄與縣學訓導李傳敏率師援之次蓮荷墟詰旦戰於蕎麥塘賊少卻麾後軍繼進賊分左右翼抄擊圍秉衡遂被擒擁見賊渠挺立大罵賊砍其腓仆地益瞋目醜詆賊怒剗其一目旋叢刺之死時五月二十二日也是夜賊遁後五日其子往覓屍獲之身受二十餘創而鬚髯猶怒張云

職員李治續附生李文淳

職員袁毓龍監生余湘重童生胡際昌王拱平李克靖